


CELEBRACIÓN EN OS COTOS


28-29 de decembro do 2024

DÍA DA SAGRADA FAMILIA



Os COTOS COA IGUALDADE VERDADEIRA DAS PERSOAS,
COS POBOS QUE SOFREN INXUSTIZA E ABANDONO,
COS REFUXIADOS E MARXINADOS DA SOCIEDADE,
COA NATUREZA MALTRATADA,

E SEMPRE SEMENTANDO PAZ



1.- ENCONTRO DA COMUNIDADE

(tod@s de pé)

@ monitor/a está na sé

SAÚDO DE BENVIDA

CANTO 🎵 *nº 1 (65) Imos compañeiros imos
Ou Unha xuntanza de amor*

Celebrante:

Benvidos sexamos todos a esta celebración. Reunímonos para compartir en comunidade a nosa fe no nome do Pai e do Fillo e do Espírito Santo.

No tempo do Nadal, a liturxia pon esta festa da Sagrada Familia á nosa consideración. Quere que vexamos que Deus feito Xesús vive coma nós no fogar da familia de Nazaret.

Xesús nace nunha familia coma calquera outra na que é preciso vivir unhas relacións asentadas no amor e respecto mutuo, froito da igualdade e a colaboración.

A comprensión, a dozura, a confianza, a comunicación e o trato digno, son actitudes que axudan a que vaia medrando cada día esa comunidade de vida e amor.

Pero na familia tamén aprendemos o esforzo, o sacrificio, a renuncia, o dominio propio, a humildade, o perdón... Sen valores coma estes, a convivencia familiar faise baleira.

Teñamos moi presentes hoxe na celebración ás nosas familias e ás que están a pasar momentos difíciles.

PROCLAMACIÓN DO GLORIA

CANTO 🎵 n° 2 (66) *Gloria ao Señor nas alturas*

(Se non se canta recítase o gloria a xeito de Salmo)

Monitor/a: *GLORIA AO SEÑOR NAS ALTURAS
E NA TERRA PAZ*

TODOS: *GLORIA AO SEÑOR NAS ALTURAS
E NA TERRA PAZ*

Monitor/a: Cantémoslle cos anxos, cos pastores,
cantemos con María e con Xosé,
a gloria e a paz que nace en Belén.

TODOS: *GLORIA AO SEÑOR NAS ALTURAS
E NA TERRA PAZ*

Monitor/a: Cantémoslle cos pobres e cos pequenos,
a quen Deus lles procura tanto ben,
a gloria e a paz que nace en Belén.

TODOS: *GLORIA AO SEÑOR NAS ALTURAS
E NA TERRA PAZ*

Monitor/a: Cantémoslle ao Deus que nos visita,
que mostra na humildade o seu poder,
a gloria e a paz que nace en Belén.

TODOS: *GLORIA AO SEÑOR NAS ALTURAS
E NA TERRA PAZ*

ORACIÓN PROPIA DO DÍA

Celebrante: *Rematamos a primeira parte da celebración presentando no silencio o que rebule no noso interior, e agradecemos a familia na que compartimos e medramos.*

(silenzio)

Celebrante:

Deus, noso Pai, Ti quixeches darnos a Sagrada Familia coma exemplo.

Concédenos a graza de practicarmos coma ela as virtudes familiares estando unidos polos vínculos do teu amor. E cando remate o noso camiñar por esta terra xúntanos a todos na alegría eterna do teu fogar.

Pedímoscho polo mesmo Xesucristo, que viviu en familia e reina por sempre eternamente. Amén.

2.- PROCLAMACIÓN DA PALABRA DE DEUS

(sentad@s) a palabra de Deus proclámase dende o ambón

Celebrante: *Moitas veces temos escoitado falar da familia, moitos son os modelos que a sociedade nos presenta. E somos moi dados a xulgar, cando quizais o mellor sexa valorar o que a familia nos aporta.*

Hai moitos valores que aprendemos na familia. A palabra de hoxe achéganos a algúns. Escoitemos.

No Leccionario I – C páxina 33 Col 3, 12-21 LECTURA
LECTURA DA CARTA AOS COLOSENSES

Irmáns e irmás:

Coma elixidos de Deus, santos e benqueridos, revestídevos de sentimentos de misericordia, de bondade, de humildade, de sinxeleza, de tolerancia. Aturádevos uns aos outros e perdoádevos, cando un teña queixa doutro; coma o Señor vos perdoou, perdoádevos tamén vós. E, por riba de todo isto, cinguídevos co amor, que é o lazo que todo o une e leva a perfección. Que a paz de Cristo governe os vosos corazóns, xa que a ela vos chamaron coma membros dun mesmo corpo. Sede tamén agradecidos.

Que a palabra de Cristo habite en vós con toda a súa riqueza. Ensinádevos e alentádevos uns a outros o mellor que saibades. Co corazón cheo de agradecemento cantádelle a Deus salmos, himnos e cántigas inspiradas. E todo canto fagades, de palabra ou de obra, facédeo para honra de Xesús, o Señor, dándolle grazas a Deus Pai por medio del.

Palabra do Señor

 **(7) 68 Con un sombreiro de palla SALMO**

(en pé) Leccionario II C páx 34 Lc 2, 41-52 EVANXEO

PROCLAMACIÓN DO SANTO EVANXEO
SEGUNDO LUCAS

Daquela, polas festas da Pascua os pais de Xesús ían todos os anos a Xerusalén. E así, cando o neno tivo doce anos, subiron á festa, conforme a tradición. Pasados aqueles días, cando eles voltaban, o neno Xesús quedou en Xerusalén, sen que seus pais se decatasen. Coidando que iría na comitiva, fixeron unha xornada de camiño; entón buscárono entre os parentes e coñecidos. Pero como non deron con el, volveron a Xerusalén para E resulta que, ao cabo de tres días, atopárono no templo, sentado no medio dos doutores e dialogando con eles. Todos os que o escoitaban estaban asombrados do seu talento e das súas contestacións. Ao velo, ficaron moi impresionados, e a súa nai preguntoulle:

- ¡Meu fillo! Como te portaches así connosco? Mira que o teu pai e mais eu andamos cheos de angustia en busca túa.

El respondeu:

- E logo por que me buscades? Seica non sabíades que eu teño que estar na casa de meu Pai?

Pero eles non entenderon a resposta. Baixou con eles a Nazaret, e vivía baixo a súa autoridade. A nai conservaba todas estas cousas no seu corazón.

Xesús medraba en estatura, en sabedoría e en graza diante de Deus e máis dos homes.

Palabra do Señor

(sentad@s) gardamos uns instantes de silencio para
acoller a palabra no corazón



O Nadal da Sagrada Familia



(en pé) **PROFESIÓN DA FE**
Celebrante: A Sagrada Familia é hoxe exemplo
para nós como comunidade, agora queremos
comprometernos no camiño da vida para sermos nós
exemplo para os demais no vindeiro 2025. Xuntos
proclamamos a fe que compartimos:

♪ *Creo, Señor, pero aumenta a miña fe*

Monitor/a

*Credes en Deus Pai,
que acompaña os nosos camiños da vida
naquel cortello de Belén, nos escombros de Palestina
e en tantas e tantas vidas rotas sen paz?*

Creo, Señor, pero aumenta a miña fe

*Credes en Xesús,
que se achega a todos nós
e nace pobre e no medio dos pobres?*

Creo, Señor, pero aumenta a miña fe

*Credes no Espírito de Deus
que nos alenta a compartir coa ilusión do Nadal?*

Creo, Señor, pero aumenta a miña fe

*Credes na igrexa,
comunidade que quere medrar acollendo a Xesús
que se fai vida en cada fogar da terra?*

Creo, Señor, pero aumenta a miña fe

ORACIÓN UNIVERSAL

Celebrante: *Imos agora rezar a Deus, porque queremos ser unha familia ilusionada e agradecida polo Nadal de Xesús. Rezámoslle a Deus Pai dicindo:*

GRAZAS POLO TEU FILLO, SEÑOR

Monitor/a

✓ Pedimos polas familias cristiáns para que saibamos descubrir na familia de Xesús, un exemplo para todos. Por iso dicimos

✓ Pedimos para que todos atopen en nós un exemplo de familia que axude a descubrir en Deus a un pai, en María a unha nai e en Xesús a un irmán. Por iso dicimos

✓ Hoxe que celebramos a fe honrando á Sagrada Familia de Xesús, pedimos por todas as familias desta comunidade de Os Cotos, especialmente polas que por unhas ou outras razóns non están tendo un BO NADAL. Por iso dicimos

✓ Pedimos finalmente hoxe tamén por todas as familias que andan á procura de refuxio e de paz. Doídos acollemos a Xesús entre os escombros de Palestina. Por iso dicimos

Celebrante: *Grazas Pai porque agora coa nosa oración comprometémonos a facer o evanxeo coma a familia de irmáns na que nos nace Cristo, noso Señor. Amén*

3.- OS SIGNOS DA COMUNIÓN CON DEUS E COA COMUNIDADE

NOSO PAI

Celebrante: *Descubrimos a Deus porque sae ao noso encontro, porque se fai comunidade, porque decide compartir con nós coma Pai, porque nos acolle nos seus brazos abertos. Agora como familia imos rezar coas palabras sinxelas e agarimosas que temos aprendido de Xesús:*

NOSO PAI ...



SIGNO DA PAZ

Celebrante: *As nosas mans tendidas uns para os outros falan da nosa vontade de vivir coma unha familia de irmáns. Sabendo que a facemos con xestos e pasos pequenos, desexémonos agora o mellor uns aos outros, e que o Deus da paz nos alente a ser luz de Nadal. Deámonos coma irmáns a paz.*

🎵 **nº 36 Fagamos a paz irmáns**

COMUÑÓN

Celebrante: *Como familia estamos arredor da mesa porque Xesús comparte con nós, e convidanos a que nós fagamos o mesmo. Este encontro é anticipo da familia que comparte á mesa á beira do Pai. Ditosos nós convidados agora a participar como familia esta Festa do Nadal do Señor.*

Señor, eu non son merecente de que entres no meu fogar, mais unha palabra túa abonda para me salvar

CANTO nº 1 (65) 🎵 Imos compañeiros imos ou nº 58 🎵 Acharte presente na vida

4.- AVISOS E DESPEDIDA

ORACIÓN FINAL

Celebrante: Pai misericordioso, Ti confortáchesnos con esta comunión. Fai que, seguindo o exemplo da Sagrada Familia, poidamos participar con eles na gloria do ceo despois dos traballos desta vida. Pedímoscho por Xesucristo, o teu fillo benquerido, que vive e reina con nós por sempre eternamente. Amén

Acollemos a Xesús coma o Salvador nacido no medio de nós. Agora dende o sitio onde estamos ou achegándonos ao Belén (se somos poucos)(sen bicar o neno) cantamos nº 72 Durme meniño (ou calquera outra panxoliña)

Coa Encarnación do seu Fillo, Deus iluminou este Nadal. Coa súa bondade infinita encha os nosos corazóns de amor e de paz. Amén

El anuncioulle aos pastores o gozo inmenso do nacemento salvador do seu Fillo. Que El encha os nosos corazóns coa súa alegría e nos faga mensaxeiros do evanxeo. Amén

E polo Nadal do seu Fillo, Deus Pai uniu a terra co ceo. Que El nos faga merecentes aquí do seu amor, e no ceo da súa vida sen fin. Amén

Avísase das misas (ver folla do mes)

**Que teñamos un BO NADAL,
e o Señor, por intercesión da Sagrada Familia,
nos bendiga,† nos garde de todo mal
e nos leve ao seu fogar de vida eterna. Amén**

**MOI BO FIN DE ANO
E QUE O VINDEIRO 2025 SEXA FARTURENTO**



**“Xesús voltou con María e Xosé
e vivía baixo a súa autoridade
no fogar de Nazaret”**

Palabras do evanxeo de hoxe.

Podémonos ir en paz. Amén